

Հաստատված է
«Հայաստանի պետական տնտեսագիտական
համալսարան» պետական ոչ առևտրային
կազմակերպության գիտական խորհրդի
2022 թվականի դեկտեմբերի 21-ի N 3 - 2 որոշմամբ,
գիտական խորհրդի նախագահ, ռեկտոր



Դ. Ռ. Գալոյան
21 դեկտեմբերի 2022 թ.

ԿԱՐԳ

ՀԱՅԱՍՏԱՆԻ ՊԵՏԱԿԱՆ ՏՆՏԵՍԱԳԻՏԱԿԱՆ ՀԱՄԱԼՍԱՐԱՆՈՒՄ ՕՏԱՐԵՐԿՐԱՑԻ ՈՒՍՈՒՄՆԱՌՈՂՆԵՐԻ ՈՒՍՈՒՄՆԱԿԱՆ ԳՈՐԾՆԹԱՑԻ ԿԱԶՄԱԿԵՐՊՄԱՆ ԵՎ ԳԻՏԵԼԻՔԻ ՍՏՈՒԳՄԱՆ

1. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգը սահմանում է Հայաստանի պետական տնտեսագիտական համալսարանում (այսուհետ՝ համալսարան) օտարերկրացի ուսումնառողների կրթական ծրագրերի կրեդիտային հենքով ուսումնական գործընթացի կազմակերպման առանձնահատկությունները:

2. Ուսումնական գործընթացի կազմակերպման և գիտելիքի ստուգման հետ կապված հարաբերությունները, որոնք կարգավորված չեն սույն կարգով, կարգավորվում են համալսարանում գործող համապատասխան կանոնակարգերով և իրավական ակտերով:

3. Համալսարանում օտարերկրացի ուսումնառողների համար կազմակերպվում են նախապատրաստական դասընթացներ, բակալավրի և մագիստրոսի կրթական ծրագրեր:

4. Օտարերկրացի ուսումնառողների բակալավրի և մագիստրոսի կրթական ծրագրերի ուսումնական գործընթացը կարող է կազմակերպվել այլ ժամանակացույցով: Պարապմունքները կարող են կազմակերպվել նաև մոդուլային ցիկլերով՝ ապահովելով ուսումնական պլանում ներառված լսարանային և արտալսարանային ժամերի ծավալը:

5. Օտարերկրացի ուսումնառողների նախապատրաստական դասընթացները կարող են կազմակերպվել աշնանային և գարնանային կիսամյակների ընթացքում, ցանկացած ժամանակահատվածում՝ համաձայն հաստատված ուսումնական պլանի:

2. ԳՆԱՀԱՏՄԱՆ ԲԱԶՄԱԳՈՐԾՈՆԱՅԻՆ ՀԱՄԱԿԱՐԳԸ

6. Նախապատրաստական դասընթացների մոդուլները գնահատվում են մեկ գործոնով՝ **20 միավորային համակարգով:**

7. Նախապատրաստական բոլոր դասընթացները դրական արդյունքով ավարտած ունկնդիրներին տրվում է համապատասխան ավարտական հավաստագիր, որի հիման վրա նա կարող է ուսումը շարունակել բակալավրիատում կամ մագիստրատուրայում՝ բակալավրի որակավորման առկայության պարագայում:

8. Համալսարանի բակալավրի և մագիստրոսի կրթական ծրագրերն իրականացվում են գիտելիքների ստուգման և գնահատման բազմագործոնային համակարգի կիրառմամբ: Ուսումնառողի ամփոփ գնահատականը ձևավորվում է կիսամյակի ընթացքում գնահատման մի քանի գործոնների և դրանց կշիռների հիման վրա՝ **20 միավորային համակարգով:**

9. Ինչպես ստուգարքով, այնպես էլ քննությամբ ավարտվող մոդուլների համար բազմագործոնային գնահատման համակարգը կարող է ներառել հետևյալ գործոնները.

Բակալավրիատում՝

- 1) հաճախումներ և ընթացիկ ակտիվություն,
- 2) ուսանողի անհատական աշխատանք (գրավոր),
- 3) ամփոփիչ ստուգում:

Մագիստրատուրայում՝

- 1) ընթացիկ ակտիվություն,
- 2) գիտահետազոտական աշխատանք (գրավոր),
- 3) ամփոփիչ ստուգում:

10. Բակալավրիատում անհատական աշխատանք պարունակող մոդուլների համար «հաճախումներ և ընթացիկ ակտիվություն» գործոնի առավելագույն գնահատականը սահմանվում է **8 միավոր**, իսկ անհատական աշխատանք չպարունակողների համար՝ **10 միավոր**: «Անհատական աշխատանք» գործոնի առավելագույն գնահատականը սահմանվում է **2 միավոր**: «Ամփոփիչ ստուգում» գործոնի առավելագույն գնահատականը սահմանվում է **10 միավոր**:

11. Մագիստրատուրայում գիտահետազոտական աշխատանք պարունակող մոդուլների համար «հաճախումներ և ընթացիկ ակտիվություն» գործոնի առավելագույն գնահատականը սահմանվում է **6 միավոր**, իսկ գիտահետազոտական աշխատանք չպարունակողների համար՝ **10 միավոր**: «Գիտահետազոտական աշխատանք» գործոնի առավելագույն գնահատականը սահմանվում է **4 միավոր**: «Ամփոփիչ ստուգում» գործոնի առավելագույն գնահատականը սահմանվում է **10 միավոր**:

12. Ուսումնական տարվա սկզբին յուրաքանչյուր առարկայի կամ մոդուլի գնահատման գործոնները, գիտելիքների ստուգման ձևը (գրավոր կամ բանավոր) և դրանց կշիռները ներկայացնում է համապատասխան առարկան կամ մոդուլը դասավանդող ամբիոնը կամ դասախոսը մոդուլի համառոտ ծրագրում (syllabus):

13. Յուրաքանչյուր մոդուլի գնահատման համար պարտադիր են «հաճախումներ և ընթացիկ ակտիվություն» և «ամփոփիչ ստուգում» գործոնները:

3. ՀԱՄԱԼՍԱՐԱՆԻՑ ՀԵՌԱՑՎԵԼՈՒ ԴԵՊՔԵՐԸ

14. Ուսումնառողը համալսարանից կարող է հեռացվել՝

1) ակադեմիական ոչ բավարար առաջադիմության համար,

2) փորձառության հաշվետվության պաշտպանությունից դրական գնահատական չապահովելու դեպքում (վերջնական հաշվարկային գնահատականը փոքր է 40-ից (առանց կլորացման) և (կամ) ուսանողը չի ներկայացրել փորձառության հաշվետվություն և (կամ) չի մասնակցել փորձառությանը),

3) «Հայաստանի պետական տնտեսագիտական համալսարան» պետական ոչ առևտրային կազմակերպության ներքին կարգապահական կանոնները միևնույն ուսումնական տարվա ընթացքում 2 և ավելի անգամ խախտելու և կարգապահական տույժերի ենթարկվելու դեպքում: